

01 香菇

徐姿華

盡惜偲个細阿姨年初結婚吔，姨丈个屋下在該種香菇，有當大片个香菇寮，阿姨湊偲兜去寮，順續仔去香菇寮剪香菇。佢講，自家親身剪个香菇特別好食；一旦就好食香菇个偲，分阿姨恁仔錫啊，越勢想愛去，就緊喬阿姆，愛佢帶偲兜去剪香菇。

吾姆就安排一擺中部个探親旅行，俾臨晝邊仔偲兜就到細阿姨个屋下咧，親家、且姆當熱情，又係泡茶、又係切水果，來招待偲兜。食晝，係當特別个菇仔大餐，各式各樣个菇仔料理：有萋萋个香菇炒肉絲、洋菇炒荷蘭豆、木米炒黃梨、焗到金黃香酥个金針菇、用幾下種菇仔煮个湯，清甜个香菇雞、鹹香个三杯杏鮑菇，還有鹹豬肉、蒸魚仔同炒青菜，十分豐沛！

食飽晝，大人在屋肚坐寮、打嘴鼓，偲兜細孺仔就在禾埕走相逐仔、跳上跌落，搞到汗流脈絡。阿姨兜出冰到涼涼个梅仔湯分偲兜止渴，該冰冰、甜甜又合酸丟酸丟个梅仔湯一落嘴，哇！實在還爽快哪！

姨丈拿幾隻篩仔同剪刀分偲兜，講愛帶偲兜去剪香菇。香菇寮無已遠，行路五分鐘就到咧；偲兜細人仔好擲擲仔從¹等入，儕儕都想愛搶先，姨丈遽遽喝偲兜，講愛先聽

佢教仰仔剪香菇，正毋會打爽忒旨好收个香菇。

一行入種香菇个所在，兩片同大人差毋多恁高个鐵架仔，排到淦淦、裝等有機樹屑仔个塑膠盞仔，盞嘴綻出當多細細蕊、金黃色个珊瑚菇，另外一析係種咖啡色个柳松菇，較矮个架仔項係歸片个杏鮑菇；還有一區係排在地泥項个太空包，種个係秀珍菇同金針菇。俾山該向个壁項，憑等歸大排種香菇个樹截仔，姨丈講用樹截仔種出來个香菇香氣足，做得賣較好價，毋過較壞照顧。

恁大片个香菇寮，看起來當淨俐，還過，間十分鐘邊仔就會噴一到水霧，菇寮个採光足、通風好，寒、熱乜做下有電腦來控制。原旦親家公用傳統个方法來種香菇，姨丈將現代科技運用在香菇寮裡肚，事頭變輕鬆咧、收入乜較好，實在無簡單。

偲兜照姨丈个吩咐，細心細意个剪菇仔，無幾久逐隻篩仔做下裝淦各色各種个菇仔咧。偲兜愛轉个時節，姨丈還送分偲兜有菇菌个太空包，愛分偲兜帶轉去練習照顧。佢講，朝晨、暗晡愛同佢噴水，一兩禮拜仔就有菇仔好收咧，這禮物實在已生趣，也分人當期待呢！

1 從：音jiung'；快速向前衝

02 蹶山

劉玉蕉

天吉光，狗吉吠，阿姆就在該咻哩！「阿榮啊，好跣哩，日頭愛出來哩啲！」

「阿珍妹，遽遽著鞋啲，愛出門哩啲！」

天甫甫仔光，日頭還在該睡目，偌兜一屋下人就目擘擘仔起腳行，共下去蹶小中崙山哩。路狹狹仔，草面頂个露水吉散，分偌兜个腳徑啊著，就歸串歸串碾落地泥，一粒一粒金哲哲像珍珠樣仔，靚到耐毋得！吾心肝肚偷偷想：若係用佢兜來串一條珍珠戩鍊，送分阿姆戴，毋知幾靚仔哦！

涼爽个風，一陣一陣吹來，路脣个花花草草，分佢吹到搖頭拗腰，領頭行禮，就像該戲臺面頂，煞猛表演个大明星共樣。行到山下，老妹湊偌拚輸贏，看麼人先跋上山嶺頂去。兩儕就恁樣頭磬磬，麼人都毋認輸，相爭拚往上。偌座大當然輸毋得，歸路毋敢停跔，鼻鼻撲撲大氣緊啟，直直拚上山，蹶到山頂，揪等心臟，佢斯跳到硬硬像愛恬忒樣仔哦！

「哇！山頂个風當涼呢！」看往下，老妹還在半山排，厥个面頰卵紅啾啾仔，偌看哪，廟肚个關公都無佢恁紅哦！一張嘴擘啊擘仔，又像細狗仔啟氣，實在還古董，還好笑！

山頂个風，特別清，特別涼爽，風裡肚有東勢果子个香氣，有花花草草个清甜味緒，這風吹到人歸身仔鬆爽，吹到人透心涼，進前蹶山个艱苦，到這下也做下毋記得吔！樹頂絡食个鳥仔嘰嘰啾啾，跳上跳下叫無停，草竇个蟲仔毋願輸佢，也唧唧滾應聲。¹打早，山頂就恁仔鬧熱濟借哩！眺望該山下，遠遠个東勢，到今還蒙等一層紗，在濛沙煙裡肚睡到毋知好醒呢！

「遽遽，大家看！還靚哦！」

東片个雲像打吔粉樣仔，紅霞紅霞。紅霞退忒，係千條萬條个金色光，對山仔个後背射出來，無幾久，一粒大火球，就對山頭跳出來哩，晟到人擘毋開目，晟到濛紗遽遽隱身。日時頭个事頭，對這下正正式起勢呢！

企在山嶺頂，偌兜放勢牯享受打早个光景，登高眺望个開闊視野，使人心情快樂，分人知得感恩，感恩大自然賜分人恁仔个好環境。阿爸長透講：「早跣床个鳥仔就有蟲仔好食。」到這下，偌總算體會著這句話个意思哩！

1 嘰嘰啾啾：音 jī jī jiū jiū；狀聲詞。形容鳥鳴